

考工典

考工典第二十八卷

城池部藝文三

重築松滋縣城記

明張居正

嘉靖乙卯松滋尹張君家傳抵任二年釐正百務積滯具舉乃爲文抵當路曰邑故有土城歲久俱圯里甲約斂民財歲歲補葺而奸民陰窺其利乾沒自潤實無益於秋毫城圯如故今獨不可規久遠一切用磚石俾奸民無所侵其利而邑以永寧且夫不一勞者不久逸不暫費者不終省竊與邑中士大夫老熟計之皆以爲修之便於是分守大參鶴峰柳公分巡憲副槐溪孫公郡守定山袁公咸報曰如令議適歲大稔遂用其年八月始事君乃捐俸酌贖庀工約費民爭趨之至十月工竣爲城八百丈蟄以巨石肩以崇關并幹樓櫓靡不宏麗屹屹爲巨觀矣異日撫治檄列郡督所屬州邑城垣宜修者所司竟持空文塞責莫敢爲先乃張君以實奉行不憚一時之勞而建百世之利民不告瘁大工克就厥功茂焉史張氏曰余讀周詩至兔置之章曰赳赳武夫公侯干城嘗歎以爲文武之初治化旁洽膠結民心雖兔置之野人皆可以爲干城扞禦何其盛也其季也疆圉多故在位

者多曠諸大夫憂之曰無俾城壞無獨斯畏勞役不已曰土國成漕吁又何瘁也豈所謂盛世之守
在人季世之守恃險耶在人者無形之險也恃險者有形之險也然亦時異世變有不得不然者明
興百八十餘年屬國家隆運海內無鷄鳴狗盜之警民至老死不見兵革可謂極盛矣往時東南瀕
海之區列縣數十富甲天下無城守局鑄之限及海寇竊發長驅諸郡民皆駢肩束手莫之敢撓何
則事變起於倉卒而人心狃於治安此必斃之道也夫無形之險既已靡恃而有形之險復不加修
則是束手駢肩俟斃已也松滋西接夔峽面江阻山卽有緩急亦要區也人之恆情能見已然不能
見將然時屬清泰未睹其利害一旦有不測則是城所繫豈直一手一足之爲烈哉詩曰許謨定命
遼猷辰告茲役有焉庸紀其事以垂不朽張君名家傳浙之鄞縣人果毅有爲其在邑治理諸務皆
如城事相其畫者縣丞蘇曜主簿韓隆董其工者省祭官田輜並列於後以彰保障之功

新建寧海縣城記

秦鳴夏

邑治東南北俱岸大海唯台姥迤透與西壤接按志唐永昌元年自海游徙今地故無城郭所恃健
跳越溪鎮場竇嶼曼嶼長亭戍所巡寨城守駢錯足爲外翰已爾有明順德海波不揚者凡二百年

治極而疊邊民挾倭爲寇闖逼關隘莫敢何問比嘉靖壬子遂大肆劫掠焚黃巖蹂昌國邑不危者
僅僅如綫閩進士雙湖林侯蒞治未幾寇至而瘁力捍禦寇退而開心拊循逃遁還集民用底定乃
屬其耆老而告之曰夫生厲有階禦寇無策曩所恃以爲安者今無賴矣無已其城乎夫城之爲役
固鉅然與其委積聚以資寇孰與併汗血以自守且吾誠不欲靳一時財力而不爲吾民建萬世長
策也衆唯唯侯命則以請於撫按藩臬咸以可報於是諏日庀工度道里平版榦均勞佚稱粟餼
凡費之出於公者六出於民者四以嘉靖壬子十月始作而以甲寅之二月成城延袤一千五百四
十一丈高二丈四尺廣一丈八尺城之東曰靖海南曰迎薰西曰登台北曰拱辰又仍其舊爲小北
門役成侯與士民登而樂之射孔星連曲洞森衛睥睨樂起閉牖高懸言言屹屹足以聳觀視而消
奸慝矣由是邑博朱君華宗熊君秀陳君朝輔暨合庠多士徵言勒石以昭後來予維世之言治者
祖襲在德在險之論莫不以城郭溝池爲保邦末務其說似也然莒陋不備師潰於楚春秋以爲譏
而南仲城朔方山甫城東方詩人歌之夫子錄焉抑何以稱乎蓋物有本末而推行先後之間則存
乎時時之所先末也有不容以後夫本者故醫家緩急標本之喻未嘗不爲岐黃之要訣也夫民患

孔棘侍吾以爲命乃吾不爲長慮却顧方泄泄然曰吾民義可使也其禮可用也卒不可爲則諉曰吾其如何此其與傳舍視民者相去能以寸哉矧今寇氛甚惡勞師匱財迄無寧歲惟天子喟然覺悟寬失職之誅重死節之獎總其責於守令一時州邑無城者咸聽修築蓋碩畫之臣其見同矣唯侯恭寬敏惠舉數百年廢墜之役屹然以身與民民亦欣然成侯之志公無羨費人無留力功無餘技不動聲色而不續用成其於本末先後之間不既有成算乎吾不知他邑之興是役者如何也是役也董之以邑丞李君定參畫程督勞勩居多若主簿許君俊典史王君椿咸預有事者也義得併書於石侯名大梁字以任閩之同安人雙湖其別號云

省城五門碑記

李夢陽

河南省城者宋之內京城也是城也自五代至宋而益飭神宗時則更築新城於外今曰土城者是也宋亡入金歷元外城毀而內城存我高皇帝定天下也蹕於汴駐焉但遣將北伐於是升汴爲京設衛十有六守焉是故是城也繕之視他城堅瑩皆甄也然又重甄而城根甄先石入之地又數尺天順辛巳河灌城乃獨北門陷猶是城也自降而爲省也置王府三司又調其十五衛去遂空其四

隅斥鹵水國又今百五十年故其城若門雖大勢巍壯而中捐蝕者不少矣嘉靖元年太監呂公來鎮茲土登城躡樓俛仰者久之乃慨然而嘆曰諺有之曰些小不補直至尺五是城也及今修之費猶省也夫門者城之喉樓者門之冕也城修宜自門始於是集三司長暨庶尹群吏議城事已又謀之撫按之臣乃僉罔協於厥迪於是呂公則毅然任曰天子勅憲之來也若曰城池軍馬汝飭汝覈今之舉固費省而功倍者乃僉罔協於厥迪僉曰動大衆者占之人舉大事者審乎時事莫大於城城非大動衆不集今兵饉役厲我民未和記有之曰因天事天因地事地度時未若占人靡和其何城之爲呂公曰嗟天下不有惠而不費勞而弗怨者乎是城也先其五門及西城土關若門計費萬金耳今無礙帑金若干斤更稍稍益之便足矣夫汴舊京也游食者夥饑則歸之盜修城之役誠計日備之菜色可活而亡命可收也如是則不動衆而大事集矣僉曰竊又聞之事無巨細人存則行是城也前之修者屢矣然上侵而下漁費倍而效寡又土木之役破除易而稽察難呂公曰嗟利弊由人耳苟子之不欲雖賞之不竊予嘗奉命修京之東門矣人無玩心工無耗財是城也舉度不中厥惟予咎於是巡撫都御史何公巡按御史王公清軍御史喻公暨三司長稔知呂公賢又計帑金

得十之六七會又有東寇閉城而門之樞朽鐵葉爛脫於是衆議始同而城之役興矣是役也始於東門程能計日經費卽功獎勤黜惰勾稽有簿大持小維工傭稱事執信布義聽其自來凡城之材礪鍛甄塋木石標炭膠角顏采皆公市平取官靡告困民罔知勞一門旣一門繼五門旣上城若門繼行之有序匪棘匪紆革之仍之各適厥中於是撤朽剝蝕植頽築虛凸凹完礱濬淺疏塞遠而望之樓櫓翬赫粉堞煥如堅者屹屹深者鬱鬱直者律律橫者翼翼迫而察之石楣鐵樞虹梁臥衝隍塹繫輪蓋一夫當關萬夫莫前者也登而覽之嵩行失險大河奪色俯而視之司府填委倉庫充實旌檠甲冑周廬是嚴足以域民威暴壯氣助武然計之則費省要之則功倍斯何也所謂事無巨細人存則行者也巡撫王公巡按俞公清軍戴公之來頗亦異同於斯城及見呂公賢乃亦咸相於厥成乃呂公則愈心於城事時時出督勞之曰嗟爾官爾工爾傭毋欺毋玩毋自阱爾躬是故一門成則盡徙其餘於他門卽拳石塊礫寸鐵尺木敝杵壞杵無妄棄者汴之爲水也出城則甘於是呂公周覽而嘆曰嗟設卒有寇至小門扃大門鑰乘障之士瞭陴之子手麾之吏渴也奚救之矣乃默禱於卜門穿一井乃五井皆甘是時布政左使劉公右使宋公實經厥費按察使張公都指揮徐公贊

畫爲力乃僉議伐石爲碑樹之南薰門月城亭焉以紀實詔來且張城大修之本也城門故各有廟是役也亦各新之而嚴其祀或問李子曰先王之建都也必城焉急然孟子則云固國不以山溪之險何也李子曰斯惡夫專事地者也非天不生非地不形非人不成是故先王之爲治也內外交飭本末具修順時豫防設險爲固人心雖和守戰是憂故曰重門擊柝以待暴客故城者民之扞也障內而嚴外者也雖然詩有之矣赳赳武夫公侯干城又曰宗子維城故不天則悖不地則害不人則空故人者本也孟子所謂地利不如人和者也善爲治者本末內外交飭而具修可也

鄢陵縣城碑記

前人

正德十三年夏四月鄢陵縣城成城周二千三百三十七丈高一丈五尺基廣一丈塹廣三丈深三之一城四門各樓門各有郭周廬十敵臺十一城四角各樓樓櫓修修長堞迢迢翼翼濯濯下壑上削畫偵宵邏鈴柝是節伺察有伯簿吏乃鉤外姦潛奪內犬靡聒是役也始於十二年正月踰年而告成費蓋巨萬緡徒數萬人云畚杵如雲登登四聞攢勞均力人人懽悅縮溢伸乏咸有紀經厥知縣章爲之云是故費罔官損役匪農妨觀者嘆績聆者頌能監之者嘉覈之者褒初知縣章至縣也

行城履隍垣鬻池凸污穢黃蒿徑蹊交交以問左右左右對曰是城也殘焉故矣前中原盜起控弦環甲者蓋數十萬焉渡河轉戰先驅略鄆鄆之城不攻而陷民以之荼是故民瘡痍未還也燼於今猶烈知縣章於是俯而思仰而嘆曰嗟乎無城無縣無民予誠不能苟一日而食乃於是集部吏召父老延鄉士夫議城事僉曰是役也衆知縣章曰吾能衆曰費曰吾能費曰費而衆上之人必以爲利己曰誠己也彼卽以爲弗己忤也誠弗己也卽以爲己吾何憂曰彼謂民勞曰誠佚之卽以爲勞之可且章聞之計小者害大道謀者寡成故鄉校毀僑覺裴誚孔聖賢且爾況其下乎始盜之入也鄆之士若夫若父老若吏恨曰設城堅吾奚以荼上而省若臬若郡長吏又恨曰設城堅吾鄆奚以荼及平也上之人謂城勞也疑己利也諸議者又謂費也衆也斯所謂厝薪而憂火者也夫渴而後井井豈渴及哉不城吾誠不能一日食鄆及城事興果有謗知縣章於監者監者覈焉獲顛末乃於是罪謗者而嘉知縣章移檄褒焉李子曰令哉章何則大者舉則細者可推矣夫政莫大於動衆功莫大於域民夫城者域民之急必衆而成者也是故書稱勤墉易戒復隍城漕城謝城韓城朔詩人詠焉武夫宗子非城莫譬也春秋之義築城必書雖美刺殊旨要之其大己力任其大民以之

域衆而弗擾是克令也故曰令哉章或曰鄆鄆克段者也段城京也祭仲憂其不度何也李子曰公私異也是故君子之動衆域民也公而後功正而後政章斯有焉故曰克令章龍氏漢川人以舉人前署德興縣學諭有捍賊功擢今官云鄆致仕尙書劉公書抵李子曰凡令鮮克令龍也克令而又城吾鄆夫春秋城必書願子書焉而鄆學諭田君祐及鄉士若夫又咸贊趣書於是作鄆陵縣城記

孟津縣城碑記

王邦瑞

嘉靖乙未之春予道孟津舍北署河水囁聽事殆盡波聲震撼几席間令人食不下咽回視向之民居櫛比鱗次者皆蕩蕩然水中是時議遷十餘年未就因賦詩而去曰禹思天下猶己之溺懋度土工惟日孜孜東至孟津洪水既治水陸遏變昏墊在此嗟嗟有位曷於弗思越七載再渡孟津稅駕新邑城郭閭井莫厥攸居縣令邢君綸振其政教百姓生生然有新之樂爰周咨度用爲喜康邢君又述改邑始末乞志之石粵孟津古名地也禹貢導河至於洛汭武王觀兵遂成大業春秋以來更置不一國朝因元之舊南距山北濱河卽以垣屋爲堤岸勢甚阡危初河趨北岸南之勢緩可無虞也嗣後河浸南潰每暴雨愁霖洶濤迅沛或上流滔天昏夜驟至目不及瞬濡首在前百姓奔呼蕩

析莫知其極雖曲加隄防與水爭地其何功之有識者久謂當遷而橫議迂心乘舟莫載至於壬辰夏六月夜水大溢懷襄縣郭民始震恐咸黜乃心而圖遷之議決矣時縣令曾君釗陳利害上之巡撫都御史簡公霄巡按御史蔡公鰲又謀及藩臬謀及守長謀及父老謀及卜筮咸從乃具疏以聞遂蒙俞命於是郡守黃公价度地得舊城西二十里名聖賢莊者去河遠而土壤良乃用牲焉時分守少參任公維賢既而張公問行爲之經營規制勞來群黎太守張公承恩實綜理之乃委別駕韓公漑往督其役於是壇墠城郭縣治學校公署民居一切民社之務秩秩具舉使以佚道而民罔告勞酌衢巷之地授民取直以充用而民不知費經始甲申春二月訖工於夏五月然肇造之初比屋未集潤色未遑繼以分守少參李公宗樞大參馮公亮分巡僉憲翟公鎬呂公懷健屬之郡守鍾公鑑復申命增飭之時縣令王君堯弼任其事殫厥心力罔有遺謀陋者崇之隘者拓之闕略者補之若祠前哲以遵化樹仁愛以表坊遏捷徑以周行合市堰以致衆是以四民悅聚轂擊肩摩迄於今遂爲弦歌之區云夫古之君子任天下之重也一夫不獲時予之辜故與之捍鬪恤患若在其身孟津之圯於河也久矣吏茲土者非一人視其民之胥沉溺及十餘年始克遷者豈非任重者有待然

乎抑安土重遷古以爲難盤庚之遷也亦惟河患至用天子之命紹先王之烈而大家世族聒聒逸口乃三詔異申以代斧鉞而後正位綏衆克有嘉績今孟津一舉而遷賴皇上明聖羣公宣力豈非斯民之大惠哉且孟津河之要害也禹導河自大伾折之而北今觀孟津而上河行山中故道有常其間岸高地卑土疏彙曠故三代之後河自南徙至於徐兗之間決裂變遷橫不可制是以北地無復有河而南北鄰近諸郡隳城郭厄運道漂廬舍壞田疇者無歲無之殷憂塵於宵旰徵調疲於閭閻此其患獨孟津耶今孟津已遷而不知南北諸郡何策以安之以東南諸郡視孟津其患又何如也嗟乎炳幾先物者存乎智利用厚生者存乎仁圖難決策者存乎勇是役也不以數百年之安而逆其必危又不謂曲防作無益可謂智矣脫昏墊於康衢可謂仁矣不惑險巖而毅然任之迄於有成可謂勇矣一舉而三善集焉是可記也

魯山縣城碑記

謝江

嘉靖戊申歲予使南陽道出魯山縣見城頽甚今逾三載而修之成蓋尹姚君卿爲之云初姚君至縣也履城池而觀焉垣巖壕壅徑竇穿凌汗敝浸濕蓬草蔓蔓乃仰而嘆曰城若此猶弗葺可憂已

遂集父老士大夫而言曰民賴城以保障無城無縣無民夫令者任保障之責也而不城是棄縣棄民其咎奚歸予將城厥城僉曰役衆費饒且上官多疑故前令避之罔敢舉姚君曰是爲私廢公爲己病民也豈可哉吾苟不竊上之人疑竊弗忤也吾苟竊上之人不疑竊忤也但於心無忤雖役衆費饒何害矧斯時寇犯中原烽燧日起雖名都巨鎮咸以崇墉爲亟況卽城之猶懼其晚顧敢避嫌而棄之也於是白之省臺遂量工經費聚備鳩材程期度候撙勞節力乃興畚杵登登四闢庶民雲若歡踴而起且靡感靡紓革仍適田利不侵下役不奪農監跡者頌覈實者褒是役也始於嘉靖辛亥三月迨十月而告成謝子曰姚其克令哉復隍之戒易闡其文勤墉之稱書昭其義故春秋凡城必書之雖美惡異迹褒貶殊旨要之惟時且義者爲足嘉姚君動協時義民用安輯誠美迹也予安得不嘉而書之哉

修築無爲州城記

徐階

無爲州故有城周若干丈其始不知所由築及元末而圯今復城之者監察御史吳君百朋也嘉靖辛亥壬子間倭賊竊寇海上州人布政參議劉君崙以待御憂居言於同知今按察僉事許君用中

請城以爲之備而無爲去海遠衆相與迂之不聽後三年倭寇益肆致焚燒郡縣劫守吏而取其藏
天子詔有司各得爲城自保於時許君已去州之吏無能任其事者明年丙辰奉命按江北會寇犯
淮揚遠近洶洶君歎曰是尙可不急圖哉乃進州守何寵條公帑之羨得若干繕使具諸費而召其
民告語之使出力以供諸役民胥應無後始事於七月八日凡爲日九十城成寇聞不敢犯州父老
子弟相與樂其生而頌君之功於是劉君走書京師請予記按誌無爲隸廬州廬在曹魏南宋蓋南
北之界而攻守者所必先也想其時高城固門百倍他郡而民之苦於兵革亦有甚焉者矣迨我朝
混一區宇列聖相繼禮教明法令一寇賊奸宄無所容其間而廬又於天下爲中土其吏民晏然無
復爭戰之慮故城之遺址坐視其沒於荒榛野草之中無復以爲省者夫豈非治平之徵而臣民之
大幸歟然君子之爲政未嘗不以其身共天下之樂亦未嘗不以其心先天下之憂城郭溝池所以
設險而守國者蓋不俟患之旣至乃爲之圖也若茲城之久而復沒也又豈非有司之失職而論政
者所深慨與自江南用兵以來戰守之務取倉卒以致喪敗者多矣彼其心非盡不知患之當備惟
夫計迂習惰而僥倖免諸其身故備之弗豫也無爲今巨州寇所窺也非賴吳君殆不免於焚劫然

國家之制吏率以九載乃得去其官惟御史之出按則一年而代計吳君之日宜易以僥倖無事而獨汲汲乎備以脫州人於兵火之中此其賢於世之君子遠矣予故爲記其事以告爲政者使知勸焉

廉郡修城記

巫鐸

國朝輿圖一統守在四方故廉城之基實始於宋而恢廓之洪武初增築西臨於江者謂之舊城至宣德間擴東之枕於郊者謂之新城周匝合千丈有奇二壕環焉麗譙四峙串樓千間畜衆容民崇文宣武其制之大者乎嘉靖癸卯前守詹公文光以串樓繁峻歲爲颶風摧毀採木陶瓦重困軍民乃集議定謀更爲雉堞是爲陽城軍民之困始蘇顧其工務速成草率仍舊上而面甃不厚下而頑石未更雨溢土解迭見傾頽雖續有修營亦惟潤色而已歲庚戌太守何公師帥於廉雖重承宣益嚴保障凡垣墉之傾圯者堅築之於雉牆之顛覆者砌飾之厚瀉水之面甃易根底之頑石不期速成而期於固守廉五載修築之功居多焉甲寅秋西寇連侵潯州南寧諸城公聞之惕然乃謀於二府陳公翰邑侯胡濟世衛侯范濟曰弭盜安民有官者之責也寇聲茲警思患豫防責將誰諉愈曰

俞於是分飭軍民戍城巡守公於子夜躬歷閫之因請於兵備經公檄修樓櫓備器械飾內外巡鋪又慮城北之郊曠僻而易致寇乃據其衝要創營設兵守之城之東南二郭門疎遠亦易犯關爰命屬官分土監築改爲月城其監於南者照磨周球典史黃嵩也監於東者千戶相鐸陳一鳳王庭槐也異地一心勸工興事故城維樓堞浹月告成居民恬息廉鄉士夫暨衛僚咸偉公之績欲壽以碑屬鐸記之鐸惟設險守固繭絲保障城池昉於古而沿於今所係重矣守土者之責也今公修城備警之功大著於廉如此其可泯耶然詹公改城之善因是而彰且以告將來之守土者公名御字子憲別號藍川福建福清人登嘉靖戊戌進士德信實而優於文章才敏達而利於經濟識者謂足以當廟堂之寄云

沛縣修城記

王樞

嘉靖歲丁未春三月沛縣城成之役也謀始於丙午某月至是訖工越如干時厥直取諸官帑之羨金如千兩城延袤幾五里爲堞千五百爲鋪八爲水門一爲甕城三爲敵臺八基廣如干崇如干南西北三面濬隍視城東臨漕河顏其門東長春南來薰西永清北拱辰法象咸備當其任則周令涇

暨分董相作如千人既成蓋屹然泗水之右可以爲政矣先是前令王治者鑒先年寇攘之變自爲土垣作四門式廓粗立周令將因而完之初聞於余余是之已而上之前撫臺克齋王公大察節菴陳公皆亟是之遂城焉今年以其成上之撫臺月梧喻公公又亟賢而甄禮之夏五月余行縣登而縱觀焉因輟然曰壯哉塞乎此東南之樞也可以爲政矣沛雖小介乎齊楚之間由漢以來率稱多故蓋自復隍之後上下千百年莫或城之乃至是始備此何以爲豈時盡訕而人盡遜與哉將事之成不成有定數也說者曰春秋內城二十三皆不時害義於齊美邢於晉美成周雖時且義亦書見勞民爲重事也城沛無當乎余曰時有乘有不乘義有因有不因乘其所不乘者其勢傾因其所不因者其害成此天地之常而幾事之會也沛爲徐屬邑當江淮之上游國家轉漕東南不導此不達昔陸宣公論唐患至急汴滎緩幽燕其說曰東寇則轉輸將阻北窺則都城或驚嗟乎今之徐沛固唐之汴滎也矧其俗輕轉徙而狎逋逃其氣崇任俠而略儒雅其計賤本業而貴末作而饑饉泛溢抑歲有加焉是故易稱設險詩美伊瀆春秋紀事美惡同辭茲役也意其必乘而難因者乎此固逸道使民之志也令爲江西貴溪人起家鄉進士其居官廉毅有識余素賢之因章之記俾後有考焉